

KOHIMA AO BAPTIST AROGO



KHRISTANUNG
TAROKDAKI

Cover Design: Mr. Imna Zulu Jamir

Published by: Kohima Ao Baptist Arogo, 2020

Kohima - 797001

E-mail: aoarogo@yahoo.com

5000 Copies (For Free Circulation)

Printed at: N V Press, Kohima

KHRISTA NUNG TAROKDAKI



KOHIMA AO BAPTIST AROGO
KOHIMA, 2020



Keta Alibatem

<i>Okila</i>	<i>1</i>
<i>Kibong Tekülem: Tajangzük Aser Agiyim</i>	<i>3</i>
<i>Anogoshia Laishiba Koda Azüngtsü</i>	<i>9</i>
<i>Koda Sarasademtsü?</i>	<i>15</i>
<i>Shisabutsür Kishi</i>	<i>20</i>



Okila

Masatangtetba Tsüngrem temeim agi asenok
Mawabanga ayuba asoshi Pa nem tetushi agütsür.
Shingaia rasaa meshitetba tensa ka nung tanü asenok
alidang, asen jenokdak aser tashiji asen Tsüngrem dang lir,
anungji maneni pa dak atsükoka alitsü ayongzüker.

KABA nung aliba züngsem aika terata aser shisabulu tia
ka ajanga oyaa alitsü südi ta bilema, kanga aria bilemtsür. Kar
pei chirnur bendang lima nung oa aliba atema shisabulu,
karbo bendang lima nungi shilanger sürnung quarantine
nung aliba atema terata, kar mapai maoba mesüra aahyangi
muotetba agi tokrong ajuruba, kar temang nung shilumanem
lir sürnung, treatment muotetba shisabulu aser ano asenok
aika Covid 19 tashidak tsübuba agi ayip mejangi alitsü südi.
Asen Tsüngrem shibai Israelpur küm lir agiaka, Egypt nungi
Kanaan lima tashi anir adok, iba Tsüngremi asenok asoshi
tajungtiba dang inyaktsü ta amanga Pa dak tali metalokdi.

Asenok lockdown mapang Lokti tekülem magiteti
aruogo, aji saka züngsem aikati pei tamang milen
jangrudakja aliba angashidang Yisu tenüng asanger. Tawa
KABA toklang tenzükertemi yamai asatangtsü apitet.
Lockdown mapang asen arogopur tamangbaren nung koma



ain, koma tsükdak, koma kibong tekülem agi, koma Lai zünga sarasadem? Iba atema random survey ka agiba nungi tajung aika ngutet aser ano tesem kar nung arogoi yaritsü nüngdak taa ngutet. Tatishitsü agi, asenok aikati sarasadem agidang; arishi moatsütsü, shirang lendong nungi aneptsütsü, aser kibong kümzüka toktsütsü dak alaka sarasadem rajema magitetba lir. Yamajisa Kibong Tekülem agiba nung süaka mesüra Lai azüngba nung süaka, tongmelang tesayuba kar ajener agütsü nung ano tang dang nungi tajungba akümtsü ta amanga, item onük kar arogoi kibong shia den lemsar. Item onük yagi ajak temoatsü aser tanela terenlok angutsü ta amanger.

Tsüngremi KABA züngsem shia, yangi Kohima nung liaka mesüra jila balala nung liaka, kümzüka yujang ta arogoi maneni sarasademtsür. Tsüngremi nenok ajak moajangma.



(REV. M. ASANGBA LONGKUMER)

Senior Pastor, KABA

June 2020



KIBONG TEKÜLEM: TAJANGZÜK ASER AGIYIM

*(Kibong Tekülem ta tenüng agüjaka, kija alir ajaki ibai
amshitettsü)*

Amangbayim, loktilibayim, sobalibayim, oda
nisung ka taküm rangben 'mendenji' kibong
ya lir. Kibong ka ajanga kotak mesüra mulumi
ajangzüktsü. Lokti tajung mesüra tamajung küma
yanglutettsü sapiji kibong ket nung lir. Aser kibong ka
tashi eita yanglutettsü miim mapa kaji, Kibong Tekülem
nendaknendaka agiba ya lir. “Tanur ka pei aotsüba
lenmang nungji sayutetang; aser pai tain akümdang iba
nungi mepilatsü” (A. Shin 22:6).

Lockdown mapang KABA nung aliba kija aser
kibong aikati, Kibong Tekülem jangraa agiba angazüka
Tsüngrem tenüng asanger. Tanga mapang nungbo,
asenok aika mazüngi aliba den TV aser Mobile phone
ajanga kibong tekülem agitsü aiben jangjunga aru. Saka
lockdown mapang kibong tekülem asentenshia takokba
nung agitetbaji temoatsü tulu rongnung ka ta sükokdi.

KIBONG TEKÜLEM TAJANGZÜK ASEM

1. **Tesendaktep aser Temeim aindak:** Ki ka nung
külemi liaka 'ajak mazüngi aliba putu' ka nung alir



asünung, Kibong Tekülem sabangjidang kidang alir
ajak ajurutepdakji lir. Apuani, tsürapur aser tanur
aser kidang alir ajak otsü lunga, anogo piyong
inyakba osang agitepa, aser asüngyanü inyaktsü
sentongtem lemsatepa aliba ajanga, tesendaktep
aser temeim memeteti ainer. Oren kati dang shidi
asübo, 'Kibong Tekülemji kibong tepela tzüpokdak
lir.' Ibai dang meranga aser junga agitet nung,
lenmang aisü nung kibong rangben ajangzüktsü
aser aintsü. “Kibong kati pei sasa lemsara, iba
kibongji noktaka melitet” (Mark 3:25).

2. **Tamang aser Khristan Jakla aindak:** Tamang
aintsü atema lenmang aisü lir: tekülem sentepi
aoba, tenzükba, Lai zünga sarasademba, kulisüba
etc, saka tamang aser Khristan jakla moluteta
aintsü tajungtibaji kibong tekülem ya lir. Iba
tekülem nung Tsüngremi meimba indang jembir,
tatok agütsütsü, aremzüka alitsü, temeshi taküm
alitsü, ochi nung nokdaktsü onüktem oda jembir
alir. Iba den Lai zünga sarasademba jagi tamang
nung ainer. “Ne chiyungtsü tzüma nung prokang;
kechiaser nai anogo aika lir aji angutsü”
(Sayutsüngir 11:1).
3. **Sobaliba aser Libaliro aiendak:** Kibong Tekülem
agidang, memeteti dang yimer indang jembir aser
sarasademer, kinünger adianu nüngdakba indang



jembir, jayajako indang jembir, aser kidanger kiyonger den koda azüzüktepa alitsü indang jembir aser ibaji taküm tepiyong atema lesson tulu lir.

Tanabuba nung, tanga kin den kibong akümer dak alaka, kibong tekülemji Ao o nung timba agir. Shinübaji, pei tetsü oshi ya kibong tekülem nung memeteti angazüker alir. Anungji Kibong Tekülem agiba ya tanela taküm aintsü atema dangbo masü saka taküm ka rangben aintsü atema tamendakdak lir.

KIBONG TEKÜLEM AGIBAYIM

lockdown mapang, asen arogo nung kibong tekülem agia aruba asatangba (random survey) ajanga ngutetbaji, aikati kibong tekülem junga agiteter, aser ano aikati ibai koda agitsü terata nung lir. Ano lanurtem nungi ngutetba kaji, kibong tekülem ya agitsüla saka mapang 'tatsüba aser tongmelangba' agi agitsüla. Anungji kibong tekülem nisung ajaki tangatetba aser tejangraba nung agitettsü nükla nung, 'agiyim' tetuyuba kar agütsür.

1. **Kibong tekülem ya aonung shia agitsüla (karibo anepdanga agir):** Khen khen dang agira, aiben tamakok angutsü. Kinungbu aser Kinungtsü na telungjem tenangzükba ka yur, tia ajak nung kibong tekülemji ozüng ka ama aonungshia agitsüla.



2. **Aonung shia mapang telemtetba ka ayubasa tajungba:** 7 PM, 8 PM mesüra 9 PM nung agitsü telemtetba yura, iba mapang atongdangji tsürapur aser tanur ajak temulung renema alir. Hau, tensa apir mapangji melenshitsü akok, saka mapang lateta ayubasa tajungba.
3. **Tayonger:** Tsürapur abensaa aliba kibong nungbo, akok tashi nung kibong tekülem ayongsangji 'Tebu' asütsüla. Tsüngremi tebutem nem nungloktsüba mapa kaji, Yob-i putir ka ama par kibong atema tarungba tenla agütsüba amato, kibong nung tebuji putir ka ama lir (Yob 1:5).
4. **Koda Agitsü Tetuyubatem**
- ☞ Khen khen külemi ken tena agitsü akok,
 - ☞ Laishiba tekong ka / tapu ka zünger agitsü akok,
 - ☞ Anogoshia Chiyongtsü Kaket ama zünger agitsü akok,
 - ☞ Kinünger adianu den meimtepa alitsü jembir agitsü akok,
 - ☞ Pei adianu, yimer, kin, arogo atema sarasademsütsü akok,
 - ☞ Lai nungi/ tajangshiba nungi lemsateper agitsü akok,



- ☞ Arogo calendar nung aliba sentongtem atema agitsü akok,
- ☞ Tanur tila lira, parnoki ken/Lai zünger agitsü akok,
- ☞ Tanur teintet lira, kati khen kati khen ta lemsar agitsü akok,
- ☞ Ita kaka atema Routine lemsaa yur agitsü akok,
- ☞ Laishiba kaket ka shimteter tarensena/melentepa azüngtsü akok,
- ☞ Sarasadem onük bendener agitsü akok. Talisa tanurtem dang par medemer ka atema sarasademtsütsü tenüng asüngdangtsü akok, mesüra par tesayur, school/ college atema sarasademtsütsü akok.
- ☞ Kibong ajungai kodangsa 'külemi' ola adoka sarasademdir, tebu aser tetsüi ola 'tashi agi adoka' sarasademang ta mogintemi ashir. Tenati tanurtem zükbanga sarasademdang, tanuri marentaki ola adoka sarasademtsü shizüker.
- ☞ Khen khenbo (talisa shi nung belemer alidang mesüra menumeyang mapang nung) 'Kü den liang' or 'Tsüngrem sangang pai moatsür' ta asüba sarasadem ken tener danga mejangtsü akok.



TEKÜMDANGTSÜ ANA

1. Kibong Tekülem tongtibangtiba ranglokji 'Tsüngrem Külemba lir.' Anungji mapangi bener arutsüba ama onük balala lemsatepaka, tongtibangtiba nükjidongji 'Tsüngrem den tekülem agiba lir' aser aji mamadoktsüla.
2. Kibong Tekülem ya aonung shia Tanur Artsütsü atema masü. Hau, melenshitsütsü aser artsütsüji nüngdaker saka kibong tekülem shia Lecture dang agütsü nunga, ibajia tetibo tanang masütsü.

O TEMBANG

Kibong Tekülem tenzüka malir atema mezüngbuba tenzüksüji mapa tulu ama asütsü saka khen tenzükerbo, ibai atangji ner kibong asoshi tajangzük tulutiba ta meteta arutsü. Shirnoksa metenzüki ali, temulung ulushir, June 2020 matemdangsa tenzüka aotsü ajungshir.

Kibong Tekülem ya atangji kibong, arogo, aser lokti ajak atema tongtiret ama lir. Ibai khuret ka ama masü saka pelatepa aser sadoksadoka kati ka den aser Tsüngrem den lungjemba mapang südaktsüdi. Amen.



ANOGOSHIA LAISHIBA KODA AZÜNGTSÜ

Khristan-a ta sür Laishiba mezüangi aliba taküm kaji electricity line mesanga yur light bulb meinok amai lir. Laishiba azüngba ajanga dang Tsüngremer tesangwaji asen taküm nung yaloktsür. Kechiaser Tsüngrem O-ji “kü tsüng asoshi milen, aser kü lenmang asoshi tesangwa lir” (T. Ken 119: 105). Anungji, anogoshi Newspaper, TV, aser mobile reprangba ama tamanger shiai Laishiba azüngtsüla.

ASEN LAISHIBA INDANG

Laishiba nung kaket 66 lir: Tejen Lai - 39 aser Tasen Lai - 27. Laishiba nung aliba kaket 66 ya küm 1500 shi nungang zülu. Putu balala nung, tensa balala nung, tezülur balala jenti agi lai o kakettem zülu. Saka tanübo item küm paika nung zülutenbaji KAKET KA kümer, asenoktemoatsü süa azünger.

Laishiba nung kaket 66 pronglaji Tsüngrem O, “taküm aliba O lir.” Aser ajak kesa dang Tsüngremi apuoktsüba O lir. “Lai shiaji Tsüngremi apuoktsüba O aser ibai tesayutsü, tarütsütsü, metongshitsütsü, temeshiba nung aliba sayutsü asoshi tajung lir. Aji oda, Tsüngrem meyong nisung tabensa, aser mapa tajung ajak jungjunga abensatsü asoshi lir” (2 Timothy 3: 16-17).



LAISHIBA KODA AZÜNGTSÜ

Laishiba yimya süba azüngtsü atema tongtipang
MERA KAR lemsateper.

1. **Mapang ka atakteta yur azüngtsüla (setting a time):** Laishiba azüngba nung ajak dang tongtibanngtibaji, mapang ka atakteta ayuba ya lir. Mapang angudangka, mesüra azüngdangka ta masü, saka meinprong makai kenü nung mapang tatsükabosa na laishiba azüngtsü atakteta ayubaji ajak dang tongtibanngtiba lir. Mapangjibo anepdang, anungdang mesüra aonung asütsü akok. Aser anogoshia kesa mapanga masütsü akok. Saka Laishiba azüngtsübaji na asoshi anogoshia teinyaktsü rongnung ka süa atakteta yura, tanga mapa agi na meinprong mesüdaktsüi nai ne laishiba lapokerzüngtettsü.
2. **Sarasadema azüngba (Reading with prayer):** Nai mapang ka atakteta yurbo joko odang azüng tenzüktsü ta masü. Teti nai sarasadem ka sür laishiba azüng tenzükang, aser sarasadema Pa nem tenüngsang agüjaa tembangang. Ne ket nung aliba ojangtemji kotak nungi alimai yokba Tsüngrem O, taküm aliba o lir. Aser nai item ya azüngdang Tsüngremi ne dang kechi südaktsüner aser akhanger aji nai angatettsü.



Laishiba azüngba aser sarasadem kodanga tepiladaktsü. Sarasadem-i lai oji ne mulungjang nung salatsür, aser lai o jagi ne sarasademba telangzüba agütsür.

Anungji, sarasadema Pa o angatettsü aser meimtsü meshiang (Yer. 29: 12-13).

3. **Laishiba koma azüngtsü? (How should one read?):** Nai kodang laishiba azüng tenzükdir, TATONGI SHIA azüngbaji tajungtiba (in order). Tatongi shia züngang ta ashiba tetezü, Lipok nungi Jungkai Adok tashi serial nung zünga oang ta ashirba masü. Hau, “Tarensena azüngba” yamajia oda taküm nung khen anabenbosa azüngtsüla. (Küm ka nung laishiba koma züngmatsü iba indang Anogoshi Chiyongtsü Kaket nung LAISHIBA KUM KA NUNG ta angutsü).

Saka laishiba azüngtsü tenzükertem asoshibo, tajungtibaji Tasen Lai nungi azüng tenzükang. Tasen Lai nung Osangtajung kaket pezü lir –Mathi, Mark, Luk & Yohan— Item nungi ka azüng tenzüktsü junger. Iba sülen Paul shititem (13 letters) aser pastoral shititem (3 letters) nungi ka aser Tenyar Mapa kaket ta melentepa azüngbaji ajanga nai laishiba tangajemba nung züngtettsü.



Nai kodang Tasen lai kakettem teimba ka züngtema odir, idangji Tejen Lai kakettem azüng tenzükang. Oda, nai tongtimbang kaket ka nungi tenzüknüra Tazüngkunem kaket ama, mesüra Isaia kaket nungi tenzük nung junger. Kechiyong item kakettem ya Tasen Lai kakettem nunga aika nung amshia lir.

Oda yangi ajak dang tongtimbangtibaji, na kodang laishiba azüng tenzükdir, nai melamelaa angatetsüba lai nungi shimteter azüng tenzüktsü akok. Ne taküm nung tensa tia balala ajurudang item tapet laitemji agiteta azüngba ajanga asangsang nung Tsüngrem O nai ajangshitsü aser temoatsü tulu angur.

4. **Nai kobika azüngtsüla? (How much should I read?):** Nai kobika aser kwika azüngtsü ta asüba tasazükji kecha balaka mali. Nai tekong ishika danga azüngtsü akok, mesüra tapu ka mesüra ana-asea azüngtsü akok. Oda, minute 10-15 shi mapang agütsütetbajia junger. Saka tongtimbangji, “kwika azüng” ta asüba dang nungibo “nai azüngbaji nai angateta bilemteter asü masü” ta asübajiang tongtimbangba lir. “Tanü azüngba laitem nung ya ni asoshi osang ka lir asü?” “Kü mapa aser tia indang kechi metetdaktsür” ta bilema azüngtsüla. Na laishiba azüngdang Ojang ka mesüra lai tekong kati ne mulungjang nung



jembira, nai item ojang mesüra tekongtemji pencil
agi asüa ayu nunga junger (underline it).

Ya meteta yudi: shingaia lai o ajakbo angatettsü
makoktsü, anungji nai tang mangatetbatem atema
shisabulua tebilem. Tsüngremi pa mapang nung ne
nem angatetdaksütsü. Mesüra ano karbo ne
akumli mapang mangateti dang süitemtsü akok.

Ano Laishiba yimya sübaa azüngba mapa nung
tongitbang kaji, azü mesen nem mokokdaksüi
meranga inyakba (with perseverance) ya lir. Nai
mezüngnüi alidanga azüngba tanela ka nungdaker.
Nai kodang ne emotion aser mood nem dang
anishidaksüdir, nai aiben takok ngua laishiba
mezüngtettsü. 2 Timoti 4: 2 nung, “tsüngküm
mapang asüdanga aser tsüngküm masüdanga nai
oji sayutsüngiang” ta ashiba ama mapang ajak nung
laishiba azüngbaji metoktsütsüla. Kechiaser, nai
mejangratiba mapang nungang süng Pai asenok
dang sayutsü mulunga lir.

5. **Nai azüngba lai Oji tashi angatsüla (obedience):**

Na kechi tia nung lidir liaka, laishiba oji tashi
angatsü ta mulungsoa alitsüla. Tat.agi, lai o
tenangzükbatemji kecha mataloker amai
bilemdanga, nai laishibaji nendaka azüngtsüla aser
tashi angatsü mulunga alitsüla.



6. Nai kodang laishiba lapokdir, ne mulungjang nung tekümtet indang tasüngdangba bener züngang, kechiyong laishiba nükjidongji ne nem Tsüngemer tekümtet agütsütsü asoshi lir. Kwiben aseni tasak mapangtem ajangshidir, iba mapang nungjiang ano Tsüngrem o ji tarokba nung nai angatetsü. Atangji, alimai Tsüngrem o yokbaji Pa tekümet metetdaktsütsü asoshi lir.



KODA SARASADEMTSÜ?

Sarasadembaji pei nüngdak Tsüngrem dang meshiba. Tsüngrem dang langka inyakdaksütsü mepishia asüngdangba ta dang angatetra, ajibo meshimetsüba ka dang ta angatettsüla. Ano sarasadembaji aiben aseni tamangba yimsü nung teinyaksü maparen ka ama, oda sarasademtsü tim ta dang angateta benshiba ka süra ibajia yimsüyimpong inyakyim ka dang asütsü.

Sarasadembaji pei taküm Tsüngrem den longjemtsü mapang agiba. Taküm tanela ajunga bendanga agüja Tsüngrem tejak bushiba. Kodang asenoki yamaji Tsüngrem den longjema kümdir idangji Pa temeim tali meteta akümer. Pa mulungba, Pa sentong aser asen Tsüngremji tali tarokba aser tejangjaba angateter. Yamaji Tsüngrem den longjema akümdang pei nüngdak aser Tsüngrem nem kechi inyakdaksüner, itemji shitak aser nendaka pa dang shitettsü akoker (1 Yoh 5: 14, 15).

KODA SARASADEMTSÜ? – LENMANG KAR

Tsüngrem den pei taküm tanela lungjema akümütsü asoshi pei temenen bushia nangzüktsüla (Yoh 9:31). Pa den tesendaktep shitak akatsüla (Mt 3:23). Pa dang tamang katettsüla (1 Tim 1: 19; 3: 9; 1 Pet 3: 7; 1 Tim 1: 5;



Lk 8: 15). Asen taküm memeshiba kar danga lira, item asoshi tamasa temulung meyiptsüla. Temulungtetba aser telemtetba tasen ka agia Pa nem bendanga agütsütsüla. Yamaji bendanga agüja sarasademdang Tsüngrem den tali longjema akümer aser idangji Pa temeim aser taochi tali angateta tepela aser tenüngsang mulungjang agi Pa külema tali bendanga agütsüidang Tanelai asen dak kongshiba, asüngba aser jembiba metettsü, idangji Tanelai koma sarasademtsü asenok anir, kechiyong asenoki koda sarasademtsü memetet ta Laijagi ashir.

Nai Tsüngrem den jembitsü metenzükdang item ya ken jungjunga bilemdangtsüla

Nai Tsüngrem dang kechi asoshi sarasademner, ibaji jungjunga ne mulungjang ajak agi ashitsü renemtsüla. Sarasadembaji talangka sarasademba tatsüka sarasademba kecha balaka mali, nai koma renemer Tsüngrem dang ne mulung ajak agi shiteter aji tongtipangba.

Na sarasadem metenzükdang, Tsüngrem den na tesendaktep koma lir? Nai jembibaji Pai angashitettsüsa ne takümji bushidangtsüla (Yohan 15: 7).



Sarasadembaji o aika jembibaji tongtipang masü ne taginüba aser nai Tsüngrem dang shinübaji kechi ibaji tongtipangba lir (Mathi 6: 7).

Sarasademba nung temenen nangzükba meteni tabensa masü. Kati ka dang tatok meshiba aser Tsüngrem dang temenen nangzükbaji kanga tongtipang. Kechiyong temeshipuri mepishibaji Tsüngrem matsüngdang senti lir (Yak 5: 16).

Sarasadembaji tashi aser ain bendena ayuba mesüker

Sarasadem nung pei taküm bushia Tsüngrem den mapang kobika peria agir patakaji tanela tashi angur. Tsüngrem den tesendaktep shitak yangluteta mapang agitetbaji sen rizünga ayuba ama, nüngdak ajak nung tashi tzüpokdak ama iba tashiji amshiteter. Mapang peria Tsüngrem den tesentaktep aser temeshiba taküm yangluteta yura, nüngdak mapang nung tatsüka dang sarasadembajia tashi tulu. Sarasadem aser tanela temezütsüba bendena mayu sür jungdak nüngdak ka asoshi sashia talangka sarasademba nungji tashi kangabo makatsü akok.

Tamangdir temi talanglang sarasadem, anogo 40 tashi sarasadem. Yisu, Elija, Mosa. Saka jungdak nungbo ojang ka agi dang sarasadem aser mapa tulu



inyak. Ibaji pai sarasadem nung mapang peria agia tashi rizünga ayuba nungjagi inyak.

Tsüngrem den sarasademba nung senti mapang ka jungjunga agitettsü aser mapang telatet agia sarasademsüla.

Sarasadem langzüba metettsü kaji Tsüngremi asen mulungjang nungi khuret ajak agentsür Pa tesünep agi sünga akümbaji kanga tongtipang lir (Fil 4: 6, 7). Tsüngrem tesünepji asen dang sarasadem langzüba kuli tulutibaji lir.

Asen Kibuba Yisu iba alima nung alidang sarasadembaji mapang peria agiba angutsü. Aonung tepeyung (Mk 6: 12), mapa jenti toktsür (Lk 5: 16-17), anepdang züngia (Mk 1: 35), azüngmeyakdaki oa (Lk 5: 16). Pa sarasadem takümji ngua netsüngtemia sarasademsü nüngdak ta angateta, parnok dang koda sarasademsü sayuang ta asüngdang.

SARASADEM NUNG YA ANGATETI

Prayerless Prayer: Tsüngrem nem bendanga magütsü, temenen miima ayu, Tsüngrem den tesendaktep shitak maka. Tokolok shisatsü agi dang sarasadembaji Tsüngrem matsüngdang tagizüktsü masü, tanü asenok aikati iba sarasadem ya agir aser Tsüngremi langzütsü ama bilemer. Sarasadem ya tanela



tongpang lir, mojingi noktangtsü meranger. Anungji
Tsüngrem den temeshiba tesendaktep shitak ali mali
metetta renemer sarasademtsüji angatettsü nüngdak.



SHISABUTSÜR KISHI

Kija aser kibongtem ajak anema alitsü teyimla nung tamasa amangba pur ajak dangi asen KABA Office ajanga Khrista temeim salem tulu lemsateper.

Asenoki kodanga meyimplaba aser majangshiba wara ka ajanga asen tendak yimya libaliru tasen ka asenok dangi bener arutsü nung aiben tejak shiotepa ajuruteptsü tasak kümogo. Iba tendak nungya kija aser kibong kar nungbo tia aser tensa tajung, tamajung jenti ajuruya alitsü südi. Yamala tensa aser tia ajak nung asen arogo sarasadem na aser ner kibong den lir ta tamasa lemsar.

Joko ita aika tendak tasen ka nung libaliruyonga aoer asünung, kija aser kibong aika nung libaliru yimya tasen aika ajurua alitsü ta bilemer. Oda tepela, tejashi aser shisabulu khuretttem ajuruba mapang iba tendak sarasadem ajanga tenüngsang agütsütsü aser khuret lemsanür aika alitsü südi. Yamaji kija aser kibong kari danga shisabulu khuret lemsatepnüa lira, mesüra sarasadem nungdaka lira, asen Arogo tenzükertem nenok anasa yariteptsü teti renema lir. Anungji, marendaki sadoksadoka pei khuret lemsateptsü asoshi asen KABA tenzüker mashi ka den, mashi mapang nung agüja aliba phone number ajanga jembitsü asoshi ayongzüker.



KABA TENZÜKER TEM CONTACT NUMBERS

- | | | |
|-----|--|------------|
| 1. | Rev. M. Asangba Longkümer
Senior Pastor | 9436261612 |
| 2. | Rev. I. Bendangmeren
Pastor | 9436604909 |
| 3. | Mr. Sentisashi
Pastor | 9436005796 |
| 4. | Rev. A. Chuba Jamir
Pastor | 9436077006 |
| 5. | Mr. Temjen Sempo
Pastor | 9383011565 |
| 6. | Mr. Tiatoshi Longkümer
Pastor | 9856587377 |
| 7. | Mr. O. Sashi Ozüküm
Pastor | 9436646672 |
| 8. | Mr. S. N. Among Jamir
Pastor | 9742841811 |
| 9. | Rev. Yashila Jamir
Asso. Pastor (Women) | 9436601303 |
| 10. | Mrs. Alice Walling
Asso. Pastor (CED) | 9436607475 |
| 11. | Ms. Amongbi Jamir
Asso. Pastor (Music) | 8119825294 |



- | | | |
|-----|--|------------|
| 12. | Mr. Sakurepba Tzüdir
Asso. Pastor (Youth) | 9619142146 |
| 13. | Mr. Zulu Jamir
Asso. Pastor (Mission) | 9886953441 |
| 14. | Mr. Bendangsashi Walling
Asso. Pastor | 7005023882 |
| 15. | Mr. Senti Longkümer
Home Evangelist | 9402440931 |

Tenzüktsü sarasadema atar. Tsüngremi nenok ajak
maneni moajangma.



